

內蒙古府縣志輯

中國地方志集成

民國臨河縣志

光緒五原廳志略

民國伊克昭盟概況

中國地方志集成

內蒙古府縣志輯 ⑮

民國臨河縣志

光緒五原廳志略

民國伊克昭盟概況

民國伊盟左翼三旗調查報告

民國伊盟右翼四旗調查報告

鳳凰出版社 ● 上海書店 ● 巴蜀書社

民國臨河縣志



呂咸
白保莊
王文墀

修纂
編纂

另圖
二 鉛印本影印。
本書三卷，據民國二十年（一九三

序

中國之富源在西北西北之富源在河套河套之上游在臨河其勢山河礪帶其地渠道縱橫其田土沃泉甘宜墾宜牧宜農林孕於山金可冶釣於水鮮可茹北通庫蒙西控甘新商路交匯梯航雲集誠實業之奧區兵防之要塞亦卽政治家所謂肇造新邑式廓爾宇者矣所患者漢唐變遷遼夏沈陷滄桑迭經華夷遞嬗甚至終明一代地不內屬委官書於駝棘夷私史於蟲沙值此遺文落落墜緒茫茫欲舉二千年來文物典章抱殘守闕補苴掇拾已非易易矣况乎地限蒙荒碑碣莫考俗染僿野采訪無人且茲事體大借非有宏識通才熟於當地情狀者恐率爾操觚非等於鈔胥卽類於簿記又何以言之親切有味以述往古而示來茲此縣志之修誠不可一日緩已 沛生先生東魯經生西川循吏芳漱百籍體擅三長生平足跡半國中閱人最夥歷事最多析理最精晚年治套日久其於河套之實業兵防政治過去之成迹將來之大計罔不洞若觀火持之有故言之成理又值解組借廬條然物表名山著書適當其時邑人士羣以總編纂一席屈 先生 先生鑪錘在手矩矱從心凡

無關體要者可略則略之凡有關體要者可詳則詳之 先生之心可謂精矣時而探險縫幽掃苔剔蘚時而兀坐仰思提要鉤元 先生之力可謂勞矣前不及見古人後可以待來者以一心運之以一手成之青林黑塞鼓吹文化誠不愧朝陽鳴鳳矣是編歷十有四月而告竣其中幾經挫折幾經盤錯幸賢明紳耆排衆議破羣疑始終堅持而不懈黃前局長所謂天下無一蹴而就之事誠有味乎言之也 保莊 庚午四月來臨適值是編纂功甫及半凡可以輔助進行者不惜出全力以維持之今幸告厥成功吾知發展西北之碩畫當以是編張爲張本也是爲序

中華民國二十年二月上浣

臨河縣縣長靈邱白保莊叙

序

民國初元咸於北平外部得讀潘總裁河套水利計畫書簡端盛迷五原王知事沛生政績特詳咸日嚮往之未嘗一日忘之也十六年春咸在綏適拜

總辦綏西水利之命於歸化旅邸得交沛生先生快慰饑渴就詢河套水利實業及地方利弊罔不口道指數洞中竅要蓋先生治套最久其富有經驗者然也六月咸復奉

兼攝臨河設治局局長之命咸初學製錦佐綏需才強起沛生先生爲指南助聯翩蒞臨先生擅長文學老於吏事出其緒餘遂令因地制宜百廢具舉古訓所謂爲政在人者歟冬十

月奉

廳令催修縣志咸維臨河南襟秦晉北控蒙疆東翼包綏西通甘涼大河弦貫陰山弧張泉甘土沃隱曜含光誠西北之奧秘亦并翼之金湯所患者漢唐郡縣省併無方遼金州邑廢置失常終明一代淪陷遐方尋勝址於駝棘驚世變於滄桑徵獻則故老零落考文則碑碣銷亡采風者臨流却退問俗者中道傍徨將欲考古耶二千年華夷代嬗夢如莫紀將欲證

今耶數十載風雲滄洞語焉不詳況開局修志茲事體大地方民窮財盡經費不充一難民陋俗僅采訪無人二難檔案規灰參考失據三難當是時卽有文效龍雕才稱獼祭強起操觚而能述而不能作亦鈔胥而已能作而不能擇亦簿記而已是非心通百籍體備三長惟規時而審始勢網舉而目張總編纂一席非沛生先生其誰與歸在全體事經公推在先生理無反顧案定上聞邑人士延頸企頸以爲不朽盛業指日可成矣何期咸適以病去官繼任者爲沛生先生先生宵旰勤政日不暇給修志事遂至中止咸於十七八年服務北平以郵筒屢促臨紳嗣以地方多故稽延不報皖鳳黃局長碩甫晉北彭縣長進吾先後來攝邑篆迭奉

催修縣志之令爰乃根據前案召集邑紳議定於十八年十二月十日開局修纂先生走函索請咸任內收回黃土拉垓河教堂地原檔按是案成於有清末葉爲我北方外交最痛心之事咸於十六年兼攝水利地方兩篆迭次上請收回幸

綏政府始終堅持俾咸得以貫徹宗旨迄告成功是役也渠長百餘里地逾千餘頃完全收

歸國有光我故物張我主權上托

政府之威靈下恃固結之民氣周旋壇坫幸無隕越亦何功之有筆諸志乘聊以誌雪泥之印則可若鋪烈揚休則非咸所望於先生者也天下事莫大於創始莫難於窮荒先生處窮漠絕塞人文零落之區既無左圖右史供其蒐采又無鴻儒耆宿相與參稽三更螢案半榻蠹編孜孜惟日矻矻窮年先生可謂獨任其重者矣是編大旨略於述古詳於證今疎於考據翔於事實紀現在之狀況策將來之進行作鄉土志觀可也卽作河渠貨殖農林諸傳記讀亦無不可也嗟乎士君子得志則展其所學不得志則筆之於書青林黑塞惠我好音黃沙白茅遙託逸響後有作者引而長之恢而張之亦先河後海之例也是爲序

民國二十年四月上浣

臨河設治局長涿鹿呂咸序

序

地方志書何爲而作也古之人察天地窮古今進退廟堂遨遊里巷眺覽山水考摹金石境之所觸寄之於情情之所托宣之於言故於物有志於人有志於事有志於志其不忘而已彼夫博引繁稱一鈔胥足以充之鏤金刻名一博士足以爲之藻績山川吟嘯風月一華士足以任之簡端縱有千言胸中實無一得以此言志可以陶情而不足以經世可以行近而不足以致遠歷觀古天文志五行志食貨志職方志豈第以空文自見哉此中有史法焉凡以有本有文之體隱厲可法可我之意而已其在省曰通志在郡曰郡志在縣曰縣志大而疆域之險易田野之經界河山之阨塞城邑之建置河渠水利之沿革原隰土會之肥磽戶口比較之登耗教育之興廢財賦之盈虛以至墾政鑛政牧政農政林業商業工業下而社會之習尚鄉里之風教舉莫不有志志也者原始以要終察來以彰往凡有關係於地方治要者筆則筆之凡無關係於經國之大體治世之遠謨者削則削之夫然後始可與言修志

彥邦

十八年蒞臨之時正

政府催修縣志之日考西漢臨河縣隸朔方郡郡領十縣至光武時已省併臨河諸縣爲西河郡臨河之名在東漢初已省併不復見且其地歷六朝隋唐以迄於金元忽夷忽夏旋廢旋興甚至終明一代地不內屬勢成中斷臨河舊址徧考典籍莫能確定此地理上無可徵信者一也伊古經邊大政莫詳於漢而漢書所載惟徙民十萬戶以實之一語其他設防固圉經田養民立教化俗諸大計均闕而不詳此政治上無可徵信者二也不第此也地染蒙俗文教未敷書沿亥豕之訛文襲魯魚之謬采訪乏人三難浩劫迭經民窮財竭膏薪莫繼四難然此猶未極其難也非熟習當地之經過歷史不能始終條貫非洞燭當地之目前情狀不能本末兼賅此編纂人選上難而又難者也用特召集全體紳董往復討論公推前五原縣知事臨河設治局長王沛生先生充任總編纂先生以魯西名宿爲塞北循吏博學通識物望攸歸兼以治綏日久全局情形瞭如指掌紳董全體修贊請教先生遜謝不遑蹙然弗敢任是時紳董等前席請曰地則棘荆初闢時則典冊中湮古無可考莫如述今往不可彰莫如察來可詳者詳之可略者略之可刪者刪之可增者增之只求有開之必先何慮無

徵之不信不先不後先生會逢其適惟願出其緒餘成此盛業有光下邑多矣先生鑒於羣情之迫切勉從其請嗣彥邦於十九年秋解組去官繼任者爲彭君進吾亦勤政愛民關心文化之良吏也彥邦去之日諄諄敦請俾引其已敗之緒卒成此不朽之業未幾果於是年十二月開局編纂郵書見告彥邦欣欣色喜深幸後來者居上相與有成也夫天下事一蹴而就者百不獲一尋常建一策謀一事其中不知經若何波折歷幾許盤錯而後成輕且易者尙如此而況振文化於荒徼尋墜緒於劫灰爲舉世所不經見之事重且難者又如彼乎然而沛生先生且不畏其難也且力任其重也官與紳又始終貫徹通力合作而有志竟成也於以見天下事無不可爲西北文化將於是有書爲權輿矣是爲序

中華民國二十年三月上浣

臨河設治局局長鳳陽黃彥邦撰

序

客有問於余曰臨河有可志乎曰古無可志今有可志也古何以無可志曰文不足徵獻不足徵此其無可志也今何以有可志曰宏規日肇庶政日新此其有可志也閒嘗登高遠望見夫陰山弧張大河弦貫渠道縱橫濠塹天限卽軍事家之所謂要塞也又見夫嶽峙淵渟包孕富有泉甘土肥百彙胎胚此政治家之所謂奧區也又見夫涼夏新蒙經緯商路千流沾溉綺交脈注大利所在農林墾牧此實業家之所謂天府也噫嘻中國之大勢在西北中外人士遊歷調查企圖開闢而發展之者其在斯乎其在斯乎然而其地經漢唐建置當年締造經營燦然大備何意今古代謝華夷遞嬗簡斷篇殘風微人往古人之所謂樹榆爲塞立障限夷設埃置屯之遺與夫立郡置邑敷政立教之要或搶攘於烽煙或銷沈於草萊卽有學優括地才裕畫山之輩亦無由叩寂聘虛鑒空逞臆也雖然往者不可追來者猶可紀周原猶是禹甸依然撫此山川阨塞之形勝疆里分合之經界河流墾植之成迹其中之流者峙者經者畫者登耗者損益者卽此數十年來之事實已足資後來者千百年之借鏡倘

漫不注意略無紀載恐過此以往天道日遷人事日變并此已成之局又隨風雲星霜以俱往後世之軍事家政治家實業家更欲徵信而無由西北益無開展之望此其關係非淺鮮也同仁等有見於此又奉

政府備修縣志之令幸值我 沛生先生駐旆是邦歷有年所 先生三長備體百籍漱華早歲入貢木天壯年贊襄秘席治綏最久對於當地之利病得失風土習尚以至地方將來之因革大計罔不灼然於心了然於口當是時也誠可謂難得之機會不再之遭逢矣 同仁等再三敦促羣以總編纂一席屈先生 先生辭不獲已於十八年十二月十日呈准立案開局編修亦知滄海之水不足潤龍文聚粟之儀不足噉鳳羽第以我 先生此邦與穀不忍重違羣望不得不慨任其難力任其重如此用是周諮屑焦旁搜腕脫登狼山而左右顧月落受降之城引大河以南北流雲迷高關之塞風霜雁磧燈火蜚窗墨枯雪甌毫禿霜穎計時歷三十六旬始斐然成編煌煌鉅製炳炳鴻篇先生以一心撰之以一手成之志益苦力益劬矣甘棠樹畔重結文字之緣大榆塞邊再印雪泥之迹後有作者弗可諉矣謹序

中華民國二十年四月穀旦

臨河二區區長 李增榮
陳占財 四區區長 傅正業
楊春林 全撰